

勸衆偈

〔一〕

道俗時衆等 各發無上心

生死甚難厭 仏法復難欣

共發金剛志 橫超斷四流

願入弥陀界 歸依合掌礼

世尊我一心 歸命尽十方

法性真如海 報化等諸仏

一一菩薩身 眷属等無量

莊嚴及變化 十地三賢海

時劫滿未滿 智行円未円

正使尽未尽 習氣亡未亡

功用無功用 証智未証智

妙覺及等覺 正受金剛心

相應一念後 果徳涅槃者

我等咸歸命 三仏菩提尊

勸衆偈

〔二〕

無礙神通力 冥加願攝受

我等咸歸命 三乗等賢聖

學仏大悲心 長時無退者

請願遙加備 念念見諸仏

我等愚痴身 曠劫來流転

今逢釈迦仏 末法之遺跡

弥陀本誓願 極樂之要門

定散等廻向 速証無生身

我依菩薩蔵 頓教一乗海

説偈歸三宝 与仏心相應

十方恒沙仏 六通照知我

今乗二尊教 広開浄土門

願以此功徳 平等施一切

同發菩提心 往生安樂国